



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

46. Kalenderwoche – ab 14. November 2010

Schluss mid Lusdisch

Jedzde hammor nu de sogenannde „finfde Jahreszeit“! Am elfdn Elfdn, am Mardinsdaach, genau elf Uhr elf dud die jeds Jahr ausbreschn. Jednfalls bei mansche!

De finfde Jahreszeit, was de Garnevalszeit is, die is nähmlisch nisch wie die annorn Jahreszeitn fiehr alle verbindlich - nee! De finfde Jahreszeit is freiwillisch - fagguldadief!

Was nu aber so rischdische Narrn sin, die sisich in Voreine voreinischn dun, fiehr die isse nadiehrlich Bflischd! Die renn bingdlisch elf Uhr elf mid Geschrei - ...allaf! Helau...un so - ins Radhaus nein un dun dähn Birschormeesdor endmachdn. Die iebornemm de Schlisslgewald in dor jeweilischn Gemeinde. Abor ledzdn Endes dud das keenor merkn - ooch Narrn sin keene bessren Birschormeesdor, bloß ehm bißl hibschor angezochn!

De Garnevalszeit is ja eischendlich die Zeid, wo nach aldor Sidde gefassded wern dun muss. Die Fassdnzeit dud bis Fassnachd gehn. Un dor elfde Elfde is nu dähr Daach, wo noch schnell alle Vorräde, die ehm in dor Fassdnzeit verbodn sin, wo die noch schnell vordilschd un vornischded wern missn. Ooch das Bier, gloob isch! Nee, de Garnevalszeit is keene Zeid, wo nu immor alle unendweeschd lusdisch sin. Nee - mor muss ja fassdn... also hungorn!

Am elfdn Elfdn is wemmors genau nemm dud - Schluß mid Lusdisch! Jednfalls in friehore Zeidn! Heidzudaache dud das selbsd dor närrischde Narr nisch mähr so genau nemm. Jedzde ma abgesähn von solsche Narrn un Närrinnen, die dor Bullemie vorfalln sin. Abor wemmors genau nemm dud,

dun die ooch nisch rischdisch fassdn, die dun ja ehjor fressn wie de Scheundreschor - bloß dasses ehm nisch bei sisch behaldn dun. Das is nisch im Sinne von ordnungsgemäßes Fassdn!

Mardinsdaach dud dor elfde Elfde iebrischens desvorweeschn heeßn, weils ma dähn heilischn Mardin gegähm had. Dor heilische Mardin had nu gahr nischd mid Fassdn un ooch nischd mid Narredei zu dun. Ooch nischd mid Bullemie! Das is nu bloß widdor das iebliche Durschenanndor, wie bei Osdorn odor Weihnachdn. Da kannsde nisch rausgrischn, wo nu eischendlich dor chrisdliche Sinn is, wenn de Hasn Eior leeschn odor wenn e bärdischer Greis mid Sagg un Rude kleene Kinnor einschischdorn dud. Wie dud das ins heilische Ahmdmal bassn? Un nu ooch bei dähm elfdn Elfde - Mardinsdaach!?

Was isch gelähsn hab, das is, dass dor Mardin irschendwo in Frankreisch so ums Jahr dreihunnord een Beddlor, dähr gefrom had im Windor in sein Mandl mid reingenomm had. Dähr Mandl muss also ziehmlich groß gewähsn sein. Jednfalls had sisch dann dähr Beddlor als Jesus endbubbd un dor Mardin sollte ährenhalbor Bischof wern. Dor Mardin hadde abor irschendwie keene LUSD off Bischof un had sisch vorschdeggd. In eim Gänsehdall. Abor de Gänse ham so laud geschnaddord, dassor enddeggd wordn is un Bischof wern mussde. Wo dor Mardin dann dod war, issor am elfdn Elfde beigedzd wordn. Desvorweeschn Mardinsdaach. Un Gänse, die am elfdn Elfde ledzmalisch schnaddorn dun, das sin nu de Mardinsgänse. Un die wern in de Bfanne gehaun!

Eduard Sachsenmeyer